



# Khutba Jummah

HAZRAT MUHYI-UD-DIN AL-KHALIFATULLAH

*Munir Ahmad Azim*

29 Avril 2016 ~  
(21 Rajab 1437 Hijri)

**(Résumé Khutba)**

**Après ki li fine salué tous so bane disciples (et tous bane musulmans) entier le monde avec la salutation de paix dans l'islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba Jummah lors « Islam : Ene Religion de Paix »:**

## **ISLAM : ENE RELIGION DE PAIX**

Islam ena le but pou construire ene société pacifique (c'est-à-dire, ene société ki en paix et ki encourage la paix) à tout prix. Sa c'est parski bane l'objectifs de bane dimounes ki pli élevé pas pou capave réussi atteindre dans l'absence de bane circonstances pacifiques. Le progrès spirituel aussi bien ki morale d'ene dimoune li pou possible seulement dans ene l'atmosphère pézibe. De ce fait l'atmosphère de paix li essentielle pour la construction d'ene bon société. La recherche académique aussi pou possible seulement dans bane circonstances pacifiques. Le devoir de la propagation de la vérité aussi pas pou capave faire sans ki ena ene l'atmosphère pézibe. Voilà pourquoi, ene de bane l'enseignements de l'islam c'est la réconciliation. Allah dire dans Quran Shareef: « **La réconciliation li meilleur.** » (An-Nisa 4: 129)

Concernant sa, l'islam enseigne nous pou établir la paix, même au prix de sacrifice unilatéral et la patience. Ene événement ki fine passé dans premier phase de l'histoire Islamique donne nous ene l'exemple de sa l'aspé unilatéral là. Si nous guette en arrière, nous pou constater ki à sa l'époque là ti ena ene « *pacte de non-guerre* » (pacte ki stipulé ki pas pou ena la guerre) et kot bane conditions fine fixé en acceptant tous bane exigences de l'autre groupe de bane adversaires. Pour parvenir à ene l'atmosphère de paix au sein de la société, l'islam fine donne ene certain nombre de bane commandements. Par exemple, le Saint Prophète de l'islam, Hazrat Mohammad (saws) fine dire : « *Ene croyant li celui ki bane dimounes senti zot en sécurité (avec li) en séki concerne zot la vie et zot dibiens.* » (Tirmidhi)

Ene l'autre Hadith dire: « *Par Allah, li pas ene croyant, celui ki so voisin pas à l'abri de so méchanceté.* » (Bukhari)

L'Islam ena le but pou fer tous bane dimounes content la paix et ki sa l'amour pou recherche et établir la paix là arrive à so plus haute niveau. Voilà pourquoi Allah et So Rassool (saws) fine commande nous pou saluer (bane dimounes) en souhaitant « *Assalam-u-alaikum* », qui veut dire, '*La paix lors ou*'.

D'après ene l'autre parole du Saint Prophète (saws), le meilleur Islam c'est pou saluer tous dimounes ki ou rencontrer, même si oui ou non ou conne sa dimoune là.

Pli ene dimounes répanne la salutation de paix '*La paix lors ou*' partout kot li aller, sa en fait ene manifestation extérieure de la volonté de paix ki trouve à l'intérieur de sa dimoune là. L'Islam oulé inculqué sa sentiment là dans sak dimoune afin ki li vine ene vrai amoureux de la paix, au point ki sa sentiment là commence augmenter dans so lé cœur, ziska ki sa expression intérieur de la paix ki trouve dans li là commence manifester sak fois ki li zoine ene dimoune. L'Islam li ene religion pacifique du début à la fin. Et li naturel ki sa coumsa parski tous bane meilleurs résultats ki l'Islam oulé atteindre, pou capave réussi atteindre seulement si ene l'atmosphère de paix li maintenu au niveau national et international. Sa chemin de la paix là li suivie par l'ensemble de l'univers. Li connu dans le domaine de la science couma la loi de la nature, ki imposé lors li (c'est-à-dire, lors l'univers) par Allah, tandis ki l'homme (exceptionnellement) bizin emprunte sa chemin de paix là seulement par so propre volonté, parski Allah fine donne li le libre-arbitre. Tandis ki tous créatures oblize suivre sa chemin là, mais l'homme li, Allah fine donne li le choix pou prend sa chemin là ou sois non. Si li prend li, li pou bon pou li ; si li pas prend li, eh bien, c'est li, l'homme ki pou alle dans la perte. Allah explique sa plus clairement dans Quran Shareef comme suite : « **Eski zot désire ene l'autre religion ki celui d'Allah, alors ki tous saki exister dans bane les ciels et la terre soumette à Li, bon gré, mal gré, et ki c'est vers Li zot pou retourner ?** ». (Al-Imran 3: 83).

Quand la paix li la religion de l'univers en entier, donc li bizin vine celui de l'homme aussi, de sorte ki, pareil couma Hazrat Isa (as) – Jésus Christ fine dire (dans la Bible), **afin ki la volonté du Seigneur pou capave établir lors la terre et dans lé ciel.** (Matthieu 6: 10)

Pareillement, Quran Shareef dire nous ki: « **Soleil pas pou capave rattrape la lune, ni la nuite pas pou capave devance lizour. Sakaine tourne dans so propre orbite.** » (Yasin 36: 41).

Kan Allah fine créer bane les ciels et la terre, Li fine ordonne bane kitchoses d'ene telle façon ki sak partie pou capave fonctionner dans la paix, sans ki nannié pas dérange bane les autres parties dans zot devoir et fonction. Par conséquent, pendant des milliards d'années, l'univers en entier fine continié reste dans ene l'harmonie totale à travers Allah So plan. La paix li pas ene produit externe ki pou capave être imposer artificiellement lors l'homme. La paix li trouve dans la nature même, dans so profondeur. Le système de la nature ki Allah fine mette en place

repose depuis le début lors la baze de la paix. Si sa système là pas perturbé (par l'homme ou quique ce soit), li pou continuer fonctionner dans manière original ki Allah fine créer li et ki Li (Allah) fine envie ki li fonctionner. Il est vrai ki ene condition pou maintenir le système humain lors le chemin de la paix c'est pou garde li libre de bane éléments de corruption. Voilà pourquoi le Quran dire: **« Et pas commette corruption (ou dégâts) lors la terre après so réforme. »** (Al-Arraf 7: 86)

Afin pou préserve la paix, ki fine établie par la nature, de la perturbation, deux injonctions importants fine fixé par l'Islam. Ene au niveau de l'homme même, ki mette l'accent lors l'exercice de la patience, et l'autre au niveau social, ki interdire pou prendre ene position d'attaque ou de colère.

(1) La réaction négative de la part d'ene dimoune li le plus grand facteur responsable pou perturbe la paix dans la vie quotidien. Quelques fois li arriver ki dans la vie sociale nous éprouve l'amertume à cause de bane les autres. Dans bane telles occasions, si nous réagir négativement, la situation (ou le problème) pou pli empirer au point de non-retour. Voilà pourquoi l'Islam fine enseigne nous à plusieurs reprises pou prend le chemin de la patience. Quran dire: **« En vérité, sa dimoune ki patient là pou recevoir so salaire en entier sans mesure. »** (Az-Zumar 39: 11)

Bane récompenses pour la patience zot bien grand parski la patience c'est la clé pou ouvert la porte ki pou permette l'homme pou accède à Allah et vine près avec Li et pou gagne le plaisir d'Allah. Pli bane situations ki exige patience et fermeté et la volonté pou faire confiance en Allah et So volonté zot amers, alors pli bane récompenses pou doux, ki li dans sa la vie ici-bas là et aussi dans la vie future (dans *Aakhérat*). Allah Le Tout-Puissant mette So bane serviteurs à l'épreuve. Même si Allah suffit à Li-même et pas bizin l'aide de personne, mais pou tester So bane serviteurs et tester zot sincérité et zot la foi, Li prend de zot bane promesses ki zot pou vine de l'avant et vine So bane l'aide, So bane support dans le droit chemin, et pour la justice. Quran Shareef dire :

**« Ô bane croyants, vine bane l'aides d'Allah, couma quand Jésus, fils de Marie, ti dire à (so) bane disciples : « Ki sanlà pou vine mo bane alliés pour Allah ? » Bane disciples fine réponde « Nous bane alliés d'Allah. » Ene groupe de bane zenfants d'Israël fine croire, tandis ki ene groupe fine rejette (la foi). Nous fine donc aide bane ki fine croire contre zot bane l'ennemi, et zot fine gagne la victoire. »** (As-Saff 61: 15)

De ce fait, ene dimoune ki patient li vine celui ki maintenir le système ki Allah fine mette en place kan li vine ene allié d'Allah, c'est-à-dire, en veillant à séki bane la lois et règlements ki fine établir dans le Livre d'Allah zot observé et kot sa dimoune là li donne so la vie, en passant le temps ki Allah Le Tout-Puissant fine accorde li dans répanne la paix lors la terre, sa même la paix ki trouve au profond de li-même, et ki li bizin rechercher et découvert et mette sa en pratique. La paix permette li donc pou non seulement accède à la proximité d'Allah, mais aussi

pou vine proche de bane dimounes couma li parski dans sa bane dimounes là aussi ena l'essence d'Allah.

(2) L'autre injonction, ki vize à maintenir la paix dans la société de l'homme c'est pou interdit la **guerre offensive**. Personne dans l'Islam pas ena droit pou faire la guerre les z'uns contre les z'autres. Péna aucune motifs ki considérer comme justifiable. Allah Le Tout-Puissant dire dans Quran Shareef: « **Combatte dans le chemin d'Allah bane ki combatte ou, mais pas dépasse limites. En vérité, Allah pas content bane ki dépasse limites.** » (Al-Baqara 2: 191)

De ce fait, pareil couma mo fine dire zot plusieurs fois, ena seulement ene sel la guerre ki autorisé dans l'Islam, et sa la guerre là c'est la guerre défensive. Si ene nation en écartant de bane principes de la nature décide pou faire la guerre contre ene l'autre nation, alors ene la guerre défensive, à certaines conditions, pou capave menée par sa pays ki fine être attaqué là. De ce fait, sa pays attaqué là faire sa la guerre là seulement pou protéze so bane propres droits, richesses et bane dimounes ki li représenter.

L'Islam c'est la religion de la paix. So nom même incarne la paix. La racine arabe de l'Islam c'est « *silm* » ki veut dire la paix. Quran Shareef dire: « **Et Allah invite vers la caze la paix et guide celui ki Li oulé vers ene droit chemin.** » (Younous 10: 26).

C'est donc la volonté de Dieu ki bane missiés et bane madames bizin établir ensam ene société de paix dans sa le monde temporaire là. Depuis Adam à Mohammad (saws), ainsi ki à bane gardiens-réformateurs-prophètes (as) de la communauté de bane humains et de Hazrat Mohammad (saws) (bane tels réformateurs ki fine vini et pou contigner vini après l'avènement de Hazrat Mohammad (saws)) – c'est-à-dire, en d'autres mots, ene seule communauté de bane dimounes, alors pou réussi atteindre à sa grand unification de bane dimounes là, alors la paix li bien bien important, li l'essence même du succès ki pou capave fer bane dimounes prospérer. La paix li la baze de tous bane religions. De ce fait, li nous devoir en tant ki croyants, et espérons-le, bane vrais croyants – dans le vrai sense du mot et de so signification – pou travaille pour établir la paix dans le monde, parski sa c'est la base lors laquelle tous bane progrès de l'humanité reposer. Donc, faire la paix avec ou-même, et laisse sa la paix là envahir ou en entier et repousse tous bane kitchose négatif ki pou capave alors nuire ou et ou relation avec Allah et bane les autres dimounes couma ou même. Alors, ou pou en mesure pou atteindre ou l'objectif avec succès, *Insha-Allah, Ameen*.